

Liebi Linnéa

Morn bisch du scho e Monet alt. D'Zyt sit dinere Geburt isch wahnsinnig schnäll vergange! Und doch fühlt sichs füre Papi und mi eso ah, wie wenn du scho immer bi uns gsi wersch... Jetzt grad ligsch du ufem Teppich und luegsch mit grosse Auge umenand.

Ich ha mir überleggt, dass es villicht spöter emol spannend für di chönnt si, wie dini Geburt so gsi isch. Ich has jedefalls interessant gfunde, wo mir mis Mami bitz vo minere eigene Geburt het chöne verzelle...

Also - di errächneti Geburtstermin wer dr 7. Mai gsi. Du hesch denn aber no kei Luscht gha, uf d'Wält z'cho. Will am 6. Mai Banntag in Lieschtel gsi isch, het dr Papi frei gno und no grad dr Zyschtig ah'ghänt zum sich erhole... Will du aber no bi mir im Buuch gsi bisch, het er ufe Banntag verzichtet und die Zyt mit mir und dir im Buuch verbrocht. Am Zyschtig (7.5.13) simer zäme go Minigolf spile in Augscht. Ich ha gwunne! ☺

Am Mittwoch het dr Papi müese schaffe und ich ha dehome Heublueme-Dampfsitzbädli gmacht, Wehe-Tee trunke und bitz Gymnastik ufem Sitzball gmacht. Aber nüt het ghulfe. Dir hets eifach z'guet gfalli in mim Buuch. Am Donnschtig (Uffert) isch denn in Hersbärg Banntag gsi. Zum di chli motiviere, di ändlich ufe Wäg z'mache simer dört alli zäme mitgloffte: dr Grosspapi, s'Grossmami, s'Gotti, dr Unkle Jamie, dr Papi, du und ich. Aber au das het nüt gnützt...

Am Samschtig (11.5.) sin dr Papi und ich ins Spital zu dr Anna (das isch unseri Hebamme gsi) ind Kontrolle. Zum Luege, öb bi dir im Buuch no alles okay isch oder öbs dir langsam z'äng wird. Au s'Fruchtwasser cha nach 9 Monet langsam z'wenig si oder d'Plazenta alt und verschrumpet. Aber es isch no alles in beschter Ordni gsi. Will aber s'Gotti und dr Jamie am 18. Mai ghürote hän, isch es eifach langsam Zyt worde, dass du uf d'Wält chunsch. Damit sich dr Papi und ich au bitz chöne erhole und an di gewöhne... Drum hämer denn mit dr Anna beschlosse, dass mr di wärde zum Usecho „zwingen“ und mr hän füre glich Obe am 9i e Termin abgmacht zum d'Geburt ileite. Dr Papi und ich sin ufem Heiwäg no im Mooi verbi und hän uns dört mit em Grossmami, em Gotti und em Unkle Jamie troffe zum die informiere, dass mr d'Geburt wärde ileite am Obe. Ich bi cheibe nervös gsi und es het mr nit eso passt, dass die Geburt jetzt eso programmiert wird starte und nit eifach plötzlich vo sich us cha afo, wien ich mir das während 9 Monet vorgstellt ha... Aber wäge dr Hochzyt hämer uns glich drfür entschiede.

Dr Papi und ich sin denn heime und hän d'Herr der Ringe-Trilogie wytergluegt, womer scho am Fritignomittag ahgfangi hän. Während däm hämer vorem Färnseh e feins Lachsfilet gnosse. Uf die 9i simer denn ins Spital.

Als erschts hän si denn bi uns zweine während ere guete halb Stund es CTG gmacht zum Loose, öb dis Härzli no guet schloht und zum Usefinde, öb ich scho Wehe ha. Du hesch ruhig pfuust und mir hän di mit verschiedene Hilfsmittel probiert z'wecke. Das het fascht nit klappt und drum sin d'Kurve nit eso ussagechräftig gsi. Am halb 11i het d'Hebamme denn bi mir e Tablette in dr Scheide platziert. Denn hani e Stund müese ligge blibe, damit das Tablettli am richtige Ort ligge blibt. Das isch gar nit eso eifach gsi, willi zu däm Zytpunkt öbbe all 5 Minute hät chönte go bisle ☺ Zum die Stund überbrücke hän dr Papi und ich UNO uf mim dicke Buuch gspielt. Das isch sehr schön gsi und dr Papi und

ich häns mega luschtig gha. Nach dere Stund hets denn es wyters CTG zur Kontrolle geh. Es isch alles guet, aber no ruhig gsi.

Ca. uf die halb 1 sin dr Papi und ich denn in 4. Stock und hän uns dört in unserem Zimmer igrichtet. Dr Papi het welle bi mir blibe und het drum ufeme Fäldbett grad näbe mim Bett dörfe schlofe. Är isch denn au zimlich gli ipfuust. Ich au, aber nur ganz churz! Nach öppe ere Viertelstund bini wider wach gsi, will mi Buuch so weh gmacht het. Ich ha mehrmols probiert wider ih'zschlofe, aber ligge isch total unbequem gsi. Drum bini halt chli am Bettrand ghockt, immer wider go bisle, ans Fänschter und mi am Fuessändi vom Bett go feschtthebe und probiere guet schnuufe, wenn mi Buch sich wider eso verchrampft het. Dr Papi het gmüetlich pfüselet und vo däm allem gar nüt mitgriegt. Irgendwann um die 2 bini denn emol in Gang use willi ha welle zu de Schwöschtere go froge, wasi söll mache. Aber die sin so fröhlich am pläuderle gsi, dassi se nit ha welle störe. Drum bini zrug ins Zimmer und ha denn am halb 3 dr Papi gweckt. Är het mr halt au nit chöne hülfe und wills mir nit besser gange isch, sondern mi Buuch alles wie meh het afo schaffe, hani denn am 3 dr Chnopf am Bett druckt. Wo d'Schwöschtere cho sin, hän si abe ufd Geburtsabteilig telefoniert und uns denn gseit, mr sölle doch wider abego... Mr hän no e paar Sache packt und sin denn zäme zum Lift spaziert und in 2. Stock abegfahre. Dört hän si grad wider s'CTG montiert und jetzt hets definitiv anderscht usgseh!! Öppe so wie d'Silhouette vo Ankor Wat uf mim linke Arm. Ligge isch immer no gar nit gange und drum hani dörfe ufeme Gymnastikball sitze. Dr Buch het alles wie regelmässiger und in zimlich churze Abständ gschaftt. Für mi isch es scho gar nüm lessig gsi und ich hätt mir scho jetzt gwünsche, dass es wider ufhört. Müehsam isch dä Gurt ume Buuch gsi vom CTG, wo sie immer no dra glo hän. Dä het mi so gfange und ich ha mi nit chöne bewege, wieni hätt welle. Am liebschte weri nämlich umegloffe! Dr Papi het mr in dere Zyt ufem Ball dr Rügge miteme feine Öl massiert. Das het mr chli ghulfe und es het mr eifach so guet do, ihn z'gspüre. Z'wüsse, dassi nit ellei bi isch wichtig gsi für mi. Wo denn s'CTG ändlich abghängt worde isch, bini froh gsi, ändlich chöne ufz'stoh und umez'laufe. Bi de Wehe hani mi denn immer neume ufstützt. Am Afang isches gange mit ganz fescht schnuufe. Aber bald hets mr eso fescht weh gmacht, dassi lut gschraue ha. Zum Glück isch kei anderi Frau uf dr Abteilig gsi... Irgendwann isch es mir so schlächt gsi, dassi fascht hätt müesse erbräche. Woni denn wirklich langsam nüm ha möge (es isch erscht ca. 4i gsi), het mi d'Hebamme gfrogt, öbi gärn würd probiere ins Wasser z'go. Ich bi sehr gärn ind Badwanne und ha vorhär no es Buscopan-Zäpfli griegt. Gnützt hets glaub nit so vill. In dr Badwanne isch es grundsätzlich sehr agnähm gsi. Aber die Wehe hän mi fascht umbrocht. D'Hebamme het denn no Akupunktur probiert und mir 5 Nödeli gstoche. Öb das ghulfe het, chani nit sage. Es het eifach nume unglaublich weh gmacht und ich has nüm usghalte. Ich ha überhaupt nüm mööge und nume no welle, dass es ändlich ufhört!! Ich ha eifach nume no welle schlofe... Am 5i isch dr Muetermund 3cm offe gsi. Insgesamt bruchts 10cm! Eigentlich seit me, es brucht für 1cm 1 Stund. Bi mir isch do alles zimlich vill schnäller gange. D'Hebamme het jetzt dr Anna aglütte. Si isch denn öppe am halb 6i im Spital gsi. Churz drufabe bini denn usem Wasser gstige, wo mittlerwile nüm wirklich suber gsi isch... S'Uestige isch gar nit eso eifach gsi. Will dr Abstand zwüsche de Wehe so churz gsi isch. Mr sin denn übere ine Geburtszimmer und ich bi dört uf die rähti Sitte gläge. S'linke Bei het d'Anna immer bi de Wehe ufe ghebt. Irgendwann hani gspürt, dass dis Chöpfli in mim Becki isch. Es het denn au plötzlich wahnsinnig gspannt und ich ha gwüsst, dass es jetzt nüm lang cha go. Und nach e paar

wenige Wehe bisch du denn do gsi! D'Anna het di richtig müesse usezieh und es het us minere Perspektive usgseh wie d'Geburt vomene Chälbli oder eme Rehli. Du bisch eifach zwüsche mine Bei usegflutscht ☺ Du bisch denn grad uf mi Buch gläge und hesch scho nach wenige Minute s'erschte Mol an minere Bruscht trunke. Es isch wahnsinnig schön gsi, di ahz'luege und z'gniesse. Und dr Papi und ich sin eifach froh gsi, dass alles guet gange isch und dass du ändlich do gsi bisch...